

朔州古鄯陽地為雲中支郡遙控長城外連大漠背居延而面燕京右偏關而左雁門襟山帶水四塞為固固西北一大扼塞也雍正三年

聖天子加意封疆以邊境寧謐軍丁久沐王化爰裁衛所特置郡邑於是即右衛為朔平府轄一州四縣而朔州隸焉是年三月余需次詮曹夏五選西川之梓潼令至六月引

見蒙

皇恩拔擢特授爲朔州牧于時銜

命單車就道以七月十八日抵朔受事至則

見其山川環繞土地平曠固居然上國

風也下車未幾取州志而披閱之乃知

州之有志創自前明州守李公邦直而

畢公鸞許公爾忠翁公應祥相繼增修

皆兢兢乎有憂深慮遠之思焉至我

朝順治庚子則有侯公樹屏於文獻荒殘

之餘特加修輯而後廢者復舉越康熙
壬子吾鄉方公裔又取而增益之則今
所存州志也歲久脫誤幾於魯魚亥豕
矣余不敏承乏茲土適當改隸之初徵
文考獻固司牧事也其何可以不文辭
且此數十年中建置之修廢戶口之登
耗貢賦之贏縮官師政教之隆替民風
士習之淳薄節義文章之盛衰日新月
異其所當記載者何窮州志之修又烏

可已哉是以每於因公出境足跡所至
觀風採俗弔古詢遺時時紀錄思欲招
摭舊聞纂組時事勒成一書因與紳衿
數輩商共襄厥事僉曰歲儉賦逋經營
無力未遑是也而余自莅任後蒿目警
心皇皇焉振凋起弊撫字催科日不暇
給雖欲徵文考獻以纂修志乘亦付之
有志未逮而已夫事莫重於國賦民命
而治莫先於風俗人心朔地處邊陲土

瘠民媮而又漸于侈靡之習刁悍之風
以故賦多積逋而俗鮮醇良我

皇上軫念民艱蠲租賜復重農勸墾之詔時
下教訓正俗之條屢頒而

各上憲布宣德意協氣旁流數載以來
時和年豐土地漸闢民業漸復十餘年
之逋賦輸納恐後蓋

國計饒而民生足駸駸乎大異昔觀矣而
且人文蔚起科目蟬聯鄉序太學彬彬

稱盛下逮僻壤窮鄉被服

聖訓禮讓成風亦蒸蒸漸化其驍悍之氣余
乃私心自喜曰倉廩實而知禮節衣食
足而知榮辱州志之修其在斯時乎乃
者

聖天子編集統志全書

詔直省纂輯通志檄行所屬郡邑各纂志乘
而我 郡憲劉公創修府志既成頒發
州邑煌煌文獻一時人士目擊心動忻

然以增修州志爲請余既喜其成余宿
志而平邑學博王介菴先生爲余齊年
友適有署州學之役余因丐其編纂而
州人士羣相引重有同心焉蓋府志之
修君從事爲多而余昔在郡時又與訂
有成言故也於是據紳士之請申詳

各憲俱報可乃具書幣遣使者而禮聘
焉而復招集儒生給筆札資廩餼以備
校讎於是旁搜博採取古史及志並天

文輿圖文獻通考諸書詳加考訂擇其
有關於朔者筆而錄之而因以刪解舊
志博采時事分類綜要規以大體盡其
節目準府志爲十二綱目八十有六稿
成屬余是正余以公餘披覽其間有補
舊志所未備者圖考建置外志也有即
舊志加詳者星野方輿職官名宦武備
選舉藝文也有舊志分析而今歸並者
祥異隸於星野沿革山川古蹟風俗隸

於方輿公廨學校祠祀隸於建置也至
如戶口田賦物產舊志分而為三茲則
統於賦役志而增以稅課而於圖考星
野方輿建置等目內又益以附見贈分
廬列依類以從蓋君之挾精攄思據事
屬詞者亦庶幾詳且核矣余謏劣無似
何敢侈談潤色之業顧君不以余卑鄙
互相商榷且以近今之人物藝文授余
評隲余何敢自逸乃悉心采擇除煩去

濫以求確當而於各體中亦間叅末議
以咸厥勞敢曰闡幽顯析微類備一方
龜鑑乎亦聊以畢吾初志云爾是役也
始於甲寅仲春閱三月而稿成以夏五
開雕告竣於乙卯季春於時分類編摩
者則有學正霍君連斗司訓郝君光銓
吏目朱子士顯而州屬之紳衿士庶叅
閱分校踴躍趨事不憚勞不惜費取懷
而予咸與有力焉而余因之有感矣前

明李公創修州志如草昧初開繼此若
畢若許若翁諸君子以次增修皆以蠱
多弗振爲慮至我

朝侯公當亨也之始方公值續修之際亦
惟是修舉廢墜增益時事而已其於振
民育德之事固未能暢然而滿志也余
以菲才代匱方且惴惴焉履餗是懼而
素十載歷任獨深竊喜遭逢

盛世茹濟太和頻年雨暘時若休徵協應

國賦裕而民生厚人心風俗迺於醇良於
以備實錄而光志乘視諸君子有厚幸
焉余小臣謹拜手颺言以志一統之盛
云 省

皇清雍正十三年歲在乙卯春三月上浣
賜同進士出身

特授奉直大夫知山西朔平府朔州事加二
級紀錄四次楚江陵汪嗣聖謨

重纂朔州志序

朔之志纂於明正德己巳州牧李公邦直修於嘉靖辛卯畢公鸞萬曆戊申許公爾忠崇正甲戌翁公應祥重修於

國朝順治己亥侯公樹屏康熙壬子方公叔裔就其文考其事論其世知其人李詞簡而義當其創焉者也翁承凋敝之餘侯當更新之始類有深思遠慮若畢若許若方皆因之者也而亦有淺深疎密

之不同朔舊有志茲亦修也何以名纂
曰制度數更規模全易故曰纂也創始
於前繼起於後是謂重耳明以前無志
乎曰莫可考已漢唐之代閱世皆久朔
隸中國人文迭興何以無志曰朔古用
武地也文事不多槩見何以驗之唐虞
三代之世見於堯典止曰宅朔方見於
周詩止曰城朔方而已春秋晉之北鄙
狄人居之趙襄子破林胡樓煩攘地千

里用武也秦漢相繼擊匈奴日事征伐
用武也光武居烏桓於塞內曹魏自陞
嶺以北並棄於外晉封拓拔氏爲代公
居馬邑皆狄人也非尚文事者元魏孝
文思變國俗南遷於洛懷朔爲六鎮之
一居斯地者爲柔然尉遲越勒莫弗諸
部既而六鎮皆叛羣雄竊據用武不暇
而遑文事哉北齊北周爲時無幾隋於
朔築大利城居突厥繼遭劉武周之亂

唐初屢征突厥後又居突厥降戶及沙
院朱邪誰非用武者石晉割朔以賂契
丹趙宋固文治可觀而朔之隸宋前後
未及三載然亦用武不遑文事也自是
而金而元設官分治迄於百年其間豈
無文事蓋緣朔至有明地雖內屬虛無
人焉文獻無一存者及設衛置州募人
實邊非南來從征即北方遷徙然猶外
患憑陵戎馬生郊雖尚文事大半用武

朔州志卷之一

圖考志

志何為而首圖考耶志以載籍圖以象形此圖籍所
由名也顧籍可文著圖難言傳周禮九州圖籍掌於
職方而籍不先圖良有以也觀象玩辭易固如是志
亦宜然朔州星分畢南昴北天街之間地處河東山
西陲嶺之界其間星野方輿疆域建置諸志各以類
紀而仰觀俯察匪圖弗考茲於天文地理凡有關地
方者悉繪以圖而分冠於其前庶圖與籍分而為二